

Pattison

I.

Ar m'er tal un vers a faire
que ja no·m feira fraitura;
qu'ar es enves mi escura
cil qe·m fai mal per ben traire.
Adolen,
faillimen
fui, qe·m ven!
Ben aic lai doncs pauc de sen
s'ieu anc fui ves lieis bauzaire!

II.

Seigner Dieus! Cum aus retraire
tan gran ma desaventura?
Mos dols non ac anc mesura
qe·m trastorna·l cor en caire.
Si espren
aspramen
mon talen
ira, e·m mou marrimen
quand ieu·m cuig far de joi fraire.

III.

En ploran serai chantaire
puois nuills gaugz no·m asegura, ?
car Mos Bos Respieitz pejura
que·m val mos chantars? Qu'ar laire.
Fol tormen
per parven
vauc seguen
s'als non ai mas marrimen
e dol e dolor e braire.

IV.

Desastrucs nasqiei de maire
puois totz mals mi apejura.
Ben es fols qui mal m'agura!
Pieitz cum posc aver? Pechaire! ?
Neis qui·m pen
aut al ven
a presen!
Cel tenrai per benvolen

qu'ams los huoills m'en volra traire.

V.

Dolsa dompna de bon aire
no·m gitetz tant a non·cura!
Ve·us que tolt avetz dreitura
s'ab merce·l cors no·us esclaire.
Qu'ieu n'aten
chausimen
si·us es gen,
si non faitz me peneden
issir fors de mon repaire.

VI.

Que, per l'arma de mon paire,
si·l vostre durs cors s'atura,
no·m tenra murs ni clausura
q'ieu non iesca de mon aire
mantenen
ves tal sen
don fort len
me veiran mais miei paren.
Mas vos non o prezatx gaire.

VII.

Dompna, cel qui es jutgaire
perdonet gran forfaitura
a cel ? so ditz l'escriptura ?
qe era traicher e laire!
Eissamen
en son sen,
qui non men
e non perdona corren ?
ja no·il er Dieus perdonaire!

VIII.

Per vos am, dompn' ab cor vaire
las autras tant co·l mons dura,
car son en vostra figura;
que per als no·n sui amaire! ?
Neis la gen
pauc valen,
mal volen,
neis cels qe·us vezon soven!
Mas non lor n'aus far vejaire.

IX.

Domna, pren
un coven
avinen: ?
si mais paz comandamen
ja no·m perdon neus vejaire.

X.

E si·us men
en coven
qe·us prezen,
ogan si? eu malamen
entuissequat ab varaire!

- letto 425 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/pattison-10>